

Chu p'tit fort est app'laï lé Chaté des Pez'ries sus les mappes dé Guernési et il est frânc au but dé Plleinmaont en Tortéva. Il est façounnaï comme enn' ételle, enn' affaire qu'est rare. I parâit qu'i fut bâti d's onnaïes d'avant 1621 passe qu'i fut inspectaï par les Captoines dé Paraesse à chu temps, mais nou n'saît pas sa date originale. En 1689 i fut mourtaï sus aën mappe dessinaï pour l'Eveque dé Coutances (qui caomptait Guernési acaure dans son diocese!) par Mariette dé la Pagerie. I n'tait pas en bouan état, et en 1804 lé Gouvernaeux Sir John Doyle (li qui récllâmit lé Braye du Valle et qui l'voulait comme enne défense caonte enne invâisiaon par les Français qu'était possible à chu temps,) ordounnit qué chu viar fort seit réparaï et mis en orde. Lé bâtiment fut examinaï, lé parapet fortifiaï et aën magasin pour l'amunitiaon fut bâti étout. Tout chu travas était la responsibilitaï d'la paraesse dé Tortéva surveilli par aën Jurat d'la Cour Royale et i fut fini en 1806. Treis conaons furent maontaïs dans l'fort par lé Régiment du Vouest d'la Milice dé Guernési, dauve daeux aoutes sus des pllatformes près du fort.

En 1807, durant la gniet du vingt-huit dé décembre, la frigade H.M.S. Boreas faonçit sus l'bânc d'Hanoué et enamas d'mariniers furent niaïs. I parâit qué les soudarts qui faisaient lé guet n'alaertirent pas les autoritaïs comme il' étaient daeu faire - il'taient trop otchupaïs dauve les "invalides et les faumes" qu'étaient là dans l'fort!

Durant lé Moyen Age chu fort était, dauve la Tablle des Pions qu'est aën p'tit pus lliaon, la piaèche éiouque La Chevauchée dé St Michel arrêtaït chaque onnaïe pour mangier et sé r'posaïr d'avant caontinuaïr enviars lé Valle. Tandique les pions étaient servis à laeux "tablle", les officiers étaient servis dans l'fort. Chutte processiaon arrêtit à la Réformatiaon, mais a fut faite derchier en 1966 pour célébraïr la neuf chentième anniversaire d'la conquête d'Angllettre par Guillaume lé Conquérant, et enn' aoute feïs dépis.

En 1850, la responsibilitaï pour Les Pez'ries fut transféraïe au Département pour la Guerre à Laondres, mais a fut r'tournaïe ès Etats en 1908. Lé droin caoup qu'i fut fait servi fut durant l'otchupatiaon, mais aucht'haeure il est suougni par l's Etats.